

文殊師利問菩提經

姚秦三藏法師鳩摩羅什初譯



南無本師釋迦牟尼佛

說明

本繁體校正版《文殊師利問菩提經》電子書，根據明《永樂北藏》大乘經五大部外重譯經，第 0233 部，姚秦三藏法師鳩摩羅什初譯《文殊師利問菩提經》原藏雕板印刷影印本校正，句讀僅供參考。特此說明。

仁慧草堂

二〇一七年十一月

●起誦儀

香讚

(一編)

爐香乍爇. 法界蒙薰. 諸佛海會悉遙聞. 隨處結祥雲.
誠意方殷. 諸佛現全身.

南無香雲蓋菩薩摩訶薩 (合掌三稱)

南無本師釋迦牟尼佛 (合掌三稱)

開經偈

(一編)

無上甚深微妙法 百千萬劫難遭遇
我今見聞得受持 願解如來真實義

文殊師利問菩提經

姚秦三藏法師鳩摩羅什初譯

如是我聞：一時，佛初得道，在摩伽陀國伽耶山祠，與大比丘衆千人俱。其先悉是結髮仙人，皆阿羅漢，所作已辦，心得自在，逮得己利，盡諸有結，正智解脫。菩薩萬人，皆從十方世界來集，有大¹威德，皆得諸忍、諸陀羅尼、諸深三昧，具諸神通。文殊師利菩薩、觀世音菩薩、得大勢菩薩、香象菩薩、勇施菩薩、隨智行菩薩以爲上首。如是等菩薩大衆百千萬億，其數無量。并諸天、龍、夜叉、乾闥婆、阿脩羅、迦樓羅、緊那羅、摩睺羅伽、人、非人等大衆圍遶。

爾時，世尊入諸佛甚深三昧，如實諦觀諸法性相，而作是念：“我得阿耨多羅三藐三菩提，得一切智慧；除諸重擔，度三有險道；滅無明，得眞明；拔邪箭，斷渴愛；成法船，擊法鼓，吹法螺，建法幢；轉生死種，示涅槃性；閉塞邪道，開於正路；離諸惡業，示于福田。我今當觀誰得阿耨多羅三藐三菩提？以何法得？何等是阿耨多羅三藐三菩提？爲以身得？爲以心得？若以

¹ 永樂藏：大；龍藏：天；高麗藏：大

身得，身則無知、無作，如草、木、瓦、石，四大所造，從父母生，以衣服、飲食、卧具、澡浴而得存立，必歸敗壞，無常磨滅。而是菩提，但有名字，世俗故說，無形無色，無定無相，無向無入無道，過諸言說，出於三界，無見無聞，無覺無知，亦無所得，亦無戲論，無問無示，無有文字，無語言道。若以心得，心從衆緣生，衆緣生故空如幻，無處無相無性，亦無所有。於是中得菩提者，所用法得阿耨多羅三藐三菩提，是法皆空，但有名字，以世俗故，而有言說。是皆憶想分別，實無所有，無有根本，亦無體相，無受無著，無染無離，一相所謂無相。是故，於此法中，無有得者，無所用法，亦無菩提。如是通達，是則名爲得阿耨多羅三藐三菩提。”

爾時，文殊師利法王子在大會中，立佛右面，執大寶蓋以覆佛上。時，文殊師利默知世尊所念如是，即白佛言：“世尊！若菩提如是相者，善男子善女人云何發心？”

佛告文殊師利：“善男子、善女人，當隨菩提相而發其心。”

“世尊！菩提相者，當云何說？”

佛告文殊師利：“菩提相者，出於三界，過

世俗法，語言道斷，滅諸發無發是發菩提心。文殊師利，是故菩薩應滅諸發發菩提心，無發是發菩提心。發菩提心者，如如法性相如實際，無分別，不緣身心，是發菩提心。不著諸法，不增不減，不異不一，是發菩提心。如鏡中像，如熱時焰，如影，如響，如水中月，應當如是發菩提心。”

爾時，會中有天子名月淨光德，得阿惟越致，問文殊師利法王子言：“菩薩緣何事故行菩薩道？”

文殊師利言：“汝可於此問於世尊。”

佛即告文殊師利：“汝答月淨光德天子所問菩薩行法。”

文殊師利謂天子言：“汝可善聽，我今當說。天子當知，諸菩薩道以大悲爲本，緣於衆生。”

天子言：“菩薩大悲以何爲本？”

文殊師利言：“以直心爲本。”

又問：“直心以何爲本？”

答言：“於一切衆生以等心爲本。”

又問：“等心以何爲本？”

答言：“以無別異行爲本。”

又問：“無別異行以何爲本？”

答言：“以深淨心爲本。”

又問：“深淨心以何爲本？”

答言：“以阿耨多羅三藐三菩提心爲本。”

又問：“阿耨多羅三藐三菩提心以何爲本？”

答言：“以六波羅蜜爲本。”

又問：“六波羅蜜以何爲本？”

答言：“以方便慧爲本。”

又問：“方便慧以何爲本？”

答言：“以不放逸爲本。”

又問：“不放逸以何爲本？”

答言：“以三善行爲本。”

又問：“三善行以何爲本？”

答言：“以十善業道爲本。”

又問：“十善業道以何爲本？”

答言：“以攝六根爲本。”

又問：“攝六根以何爲本？”

答言：“以正憶念爲本。”

又問：“正憶念以何爲本？”

答言：“以正觀爲本。”

又問：“正觀以何爲本？”

答言：“以堅念不忘爲本。”

天子言：“文殊師利，菩薩有幾心能攝因、

能攝果？”

文殊師利言：“天子，諸菩薩有四心能攝因、能攝果。何等爲四？一者，初發心；二者，行道心；三者，不退轉心；四者，一生補處心。初發心爲行道心作因緣，行道心爲不退轉心作因緣，不退轉心爲一生補處心作因緣。復次，天子，當知初發心如種穀田中，行道心如穀子增長，不退轉心如華果始成，補處心如華果有用。又，初發心如車匠集材，行道心如斫治材木，不退轉心如安施材木，一生補處心如車成運致。又，初發心如月新生，行道心如月五日，不退轉心如月十日，一生補處心如月十四日，如來智慧如月十五日。又，初發心能過聲聞地，行道心能過辟支佛地，不退轉心能過不定地，一生補處心安住定地。又初發心如學初章，行道心如學第二章，不退轉心如能以章爲用，一生補處心如通達深經。又，初發心從因生，行道心從智生，不退轉心從斷生，補處心從果生。又，初發心因勢力，行道心智勢力，不退轉心斷勢力，補處心果勢力。又，初發心如病者求藥，行道心如分別藥，不退轉心如病服藥，補處心如病得瘥。又，初發心法王家生，行道心學法王法，不退轉心能具足學法王法，補

處心學法王法能得自在。”

爾時，大衆中有天子，名定光明主，不退轉於阿耨多羅三藐三菩提。是定光明主天子語文殊師利法王子言：“何等是菩薩摩訶薩略道，以是略道疾得阿耨多羅三藐三菩提？”

文殊師利言：“天子，菩薩摩訶薩略道有二，以是略道疾得阿耨多羅三藐三菩提。何等爲二？一者，方便；二者，慧。攝善法名爲方便，分散諸法名爲慧。又，方便名爲隨衆生行，慧名不轉一切法相；方便名待應衆生心，慧名不待一切法；方便名和合諸法，慧名捨離諸法；方便名起因緣，慧名滅因緣；方便名知分別諸法，慧名不分別法性；方便名莊嚴佛土，慧名莊嚴佛土無所分別；方便名知衆生諸根利鈍，慧名不得衆生；方便名能至道場，慧名能得一切佛法。天子，當知菩薩摩訶薩復有二道，以是二道疾得阿耨多羅三藐三菩提。何等爲二？一者，助道；二者，斷道。助道者，五波羅蜜；斷道者，般若波羅蜜。復有二道，何等爲二？一者，有繫道；二者，無繫道。有繫道者，五波羅蜜；無繫道者，般若波羅蜜。復有二道：一者，有量道；二者，無量道。有量道者，取相分別；無量道者，不取相分別。復有

二道：一者，智道；二者斷道。智道者，初地至七地；斷道者，八地至十地。”

爾時，會中有菩薩名隨智勇行，問文殊師利法王子言：“何謂爲菩薩義？何謂爲菩薩智？”

文殊師利言：“善男子，義名無用，智名有用。何謂義名無用？義是無爲，無爲法於法無用非用。又義者，非染相，非離相，是義於法無用非用。又義不增不減，於法無用非用。天子，何謂爲智？智是忍道，道是心所用非無用，是故，智名有用非無用。智功歸於斷，是故，智名有用非無用；智名善知五陰、十二入、十八界、十二因緣是處非處，是故，智名有用非無用。

“復次，天子，諸菩薩有十智，何等爲十？一者，因智；二者，果智；三者，義智；四者，方便智；五者，慧智；六者，攝智；七者，波羅蜜智；八者，大悲智；九者，成就衆生智；十者，不著一切法智。

“復次，天子，諸菩薩有十發，何等爲十？一者，身發，欲令衆生身業清淨故。二者，口發，欲令衆生口業清淨故；三者，意發，欲令衆生意業清淨故；四者，內發，一切內物不貪著故；五者，外發，欲令衆生住正行故；六者，智發，具

足佛智故；七者，慈發，示一切功德莊嚴故；八者，衆生成熟發，守護智慧藥故；九者，有爲智發，具足定聚故；十者，無爲智發，心不著三界故。

“復次，天子，諸菩薩有十行，何等爲十？一者，波羅蜜行；二者，攝行；三者，慧行；四者，方便行；五者，大悲行；六者，求助慧法行；七者，求助智法行；八者，心清淨行；九者，觀諸諦行；十者，一切所愛無貪著行。

“復次，天子，諸菩薩有十思惟盡，何等爲十？一者，思惟事盡；二者，思惟愛盡；三者，思惟法盡；四者，思惟煩惱盡；五者，思惟見盡；六者，思惟助道盡；七者，思惟受盡；八者，思惟不著盡；九者，思惟結使盡；十者，思惟助道場行盡。

“復次，天子，諸菩薩復有十治法，何等爲十？一者，治慳貪心，雨布施雨故；二者，治破戒心，三法清淨故；三者，治瞋恚心，修行慈忍故；四者，治懈怠心，求佛法無厭故；五者，治不善覺觀心，得禪定解脫自在故；六者，治愚癡心，生助決定般若波羅蜜法故；七者，治諸煩惱心，生助道法故；八者，治顛倒道心，修助四諦

法故；九者，治執著心，時非時自在行故；十者，治我，觀無我法故。

“復次，天子，諸菩薩復有十善地，何等爲十？一者，身善，離身三惡故。二者，口善，離口四惡故；三者，意善，離心三惡故；四者，內善，不著見身故；五者，外善，不著一切法故；六者，不著助智善，不貪助道法故；七者，不自高善，思惟聖道性故；八者，除身善，修集般若波羅蜜故；九者，離顛倒善，不誑一切衆生故；十者，不惜身命善，以大悲化衆生故。

“復次，天子，諸菩薩貴隨法行者能得菩提，非不貴隨法行。隨法行者，如說能行；不隨法行者，但有言說，不能如說修行。

“復次，天子，諸菩薩復有二隨法行，何等爲二？一者，行道；二者，行斷。復有二隨法行，何等爲二？一者，身自修善；二者，教化衆生。復有二隨法行，何等爲二？一者，行智行；二者，不行智行。復有二隨法行，何等爲二？一者，善知分別諸地；二者，不分別地非地。復有二隨法行，何等爲二？一者，知諸地過而能轉進；二者，善知具足從一地至一地。復有二隨法行，何等爲二？一者，善知聲聞、辟支佛道；二者，善知佛

道不退轉行。”

爾時，佛讚文殊師利法王子言：“善哉！善哉！汝能爲諸菩薩摩訶薩說本業道，誠如所說。”說是法時，十千菩薩得無生法忍。文殊師利法王子等一切世間天、人、阿脩羅，聞佛所說，歡喜信受。

《文殊師利問菩提經》卷終

● 結誦儀

補闕真言

(三編)

南無喝囉怛那. 哆囉夜耶. 佉囉佉囉. 俱住俱住. 摩囉摩囉. 虎囉. 吽. 賀賀. 蘇怛那. 吽. 潑抹拏. 娑婆訶.

三皈依

(一編)

自皈依佛，當願眾生，體解大道，發無上心；
自皈依法，當願眾生，深入經藏，智慧如海；
自皈依僧，當願眾生，統理大眾，一切無礙，和南聖眾。

南無佛 南無法 南無僧 (合掌三稱)

南無一切如來、應、正等覺 (合掌三稱)

南無本師釋迦牟尼佛 (合掌三稱)

南無文殊師利菩薩摩訶薩 (合掌三稱)

迴向偈

(一編)

誦經功德殊勝行	無邊勝福皆迴向
普願沉溺諸有情	速往無量光佛刹
十方三世一切佛	一切菩薩摩訶薩
摩訶般若波羅蜜	

迴向偈

(一編)

願以此功德	莊嚴佛淨土
上報四重恩	下濟三途苦
若有見聞者	悉發菩提心
盡此一報身	同生極樂國



此咒置經書中可滅誤跨之罪

南无护法韦驮尊天菩萨

